

## SILAT



**KEMBANGKAN SAYAP:** Pegawai Persisi termasuk Sheik Alau'ddin berada di Armenia bagi membantu menubuhkan persekutuan silat dan memperkenalkan pencak silat di situ. - Foto PERSISI

## Misi Olimpik: Persisi ke Armenia bantu tubuhkan persekutuan silat

► **FAKHRURADZI ISMAIL**  
mfismail@sph.com.sg

DALAM misi untuk membawa silat ke Sukan Olimpik, rombongan dari Persekutuan Silat Singapura (Persisi) telah ke Armenia untuk membantu menubuhkan persekutuan silat di situ.

Ketua Pegawai Eksekutif (CEO) Persisi, Sheik Alau'ddin Yacoob Marican, diiringi dengan lima pegawai pelatihnya telah membuat lawatan selama lima hari sejak 8 hingga 14 September lalu.

Ketika di situ mereka bertemu pihak berkepentingan seperti Majlis Olimpik Kebangsaan negara tersebut.

Mereka berharap badan Olimpik itu dapat membantu mendorong penglibatan serta perkembangan seni mempertahankan diri itu di Armenia.

Pegawai pelatih Persisi yang ke sana turut mengadakan latihan silat serta mengendalikan kursus pihak juri dan wasit dengan pelajar yang menyertai kursus itu.

Mengulas tentang penglibatan Persisi dan bantuan yang ditawarkan, Sheik Alau'ddin berkata ketika berada di sana dan memperkenalkan silat, beliau berasa amat terharu dengan sambutan yang diterima terhadap sukan itu.

"Walaupun pencak silat merupakan sesuatu yang baru kepada ramai di kalangan pegawai pihak berkepentingan, mereka telah mey-

akinkan saya bahawa mereka akan menyokong Persekutuan Pencak Silat di Armenia dalam pembangunan sukan itu.

"Para pelajar yang hadir untuk seminar yang kami adakan juga berfikir terbuka. Mereka menerima latihan yang kami kendalikan dengan memberikan yang terbaik kepada pelajar sesuatu yang baru.

"Ini lebih-lebih lagi apabila ramai di antara mereka merupakan atlet dari latar belakang seni mempertahankan diri berbeza.

"Mereka juga telah mengajukan banyak soalan tentang silat, menunjukkan sifat ingin tahu tentang silat. Ia pastinya satu pengalaman yang mengharukan," kata beliau.

Mentelah lagi, Sheik Alau'ddin menambah dengan tersebarunya silat ke Armenia, ia dapat membantu sukan ini dalam mengukuhkan lagi peluang mereka dipertandingkan di Olimpik - yang telah menjadi matlamat beliau sejak sekian lama.

"Untuk membawa silat ke Sukan Olimpik, saya harus menyebarkan pencak silat ke negara-negara yang berbeza dan saya tidak akan dapat melakukan itu tanpa mereka yang mempunyai dedikasi dan berminat untuk membangunkan pencak silat di negara mereka sendiri," ujarnya.

Dengan penubuhan persekutuan silat di situ, Armenia menyertai 53 negara lain yang telah menjadi ahli Persekutuan Pencak Silat Antarabangsa (Persilat).